

**Laerskool  
Louw  
Geldenhuys**

Kinders met entoesiasme  
Onderwysers met passie  
Ouers met betrokkenheid

[www.llg.co.za](http://www.llg.co.za)

# GEDRAGSKODE VIR LEERDERS

# LAERSKOOL LOUW GELDENHUYS

## *Gedragkode vir leerders*

### Deel 1


#### DIE LOUWTJIEKONTRAK

In Louwtjies...

1. Respekteer ons mekaar.
2. Doen ek altyd my beste.
3. Is ek verantwoordelik vir my dade en emosies.
4. Het ek keuses en kies ek reg.
5. Is daar 'n tyd vir alles.
6. Leer ons by mekaar en werk ons saam.
7. Hoor ek deur te luister en stil te bly as iemand praat.
8. Is ek positief en trots op myself en my skool.
9. Is ek goed genoeg deur myself te wees.
10. Weet ek dat leierskap is om die regte ding te doen, al sien niemand wat ek doen nie.

Onderteken deur my

\_\_\_\_\_  
LEERDER



## Deel 2

### Gedragkode en -reëls

#### 1. INLEIDING

Hierdie dokument is die gedragkode van LAERSKOOL LOUW GELDENHUYS, soos die beheerliggaam dit op 22 JULIE 2019 goedgekeur het. Die beheerliggaam het die ouers, leerders en opvoeders van die skool oor die inhoud van die gedragkode ingelig. Die gedragkode is opgestel in ooreenstemming met die toepaslike bepalings van die Grondwet van die Republiek van Suid Afrika, Wet 108 van 1996; die Suid-Afrikaanse Skolewet, Wet 84 van 1996 ('die Skolewet'); die Wet op Nasionale Onderwysbeleid, Wet 27 van 1996; Riglyne vir Gedragkode vir Leerders (Algemene Kennisgewing 776 in Staatskoerant 18900 van 15 Mei 1998); die Regulasies met betrekking tot Apparate vir Dwelmtoetsing en die Prosedure wat gevolg moet word (GK 1140 in Staatskoerant 31417 van 19 September 2008); Regulasies vir Veiligheidsmaatreëls by Openbare Skole (GK 1040 in Staatskoerant 22754 van Oktober 2001, soos gewysig) en toepaslike provinsiale wetgewing.


#### 2. DOEL

Hoewel die Staat verplig bly om opvoeding beskikbaar en toeganklik te maak, moet dit aangevul word met die toewyding en verbintenis van verantwoordelike rolspelers, naamlik opvoeders, leerders en ouers. Hierdie gedragkode is bedoel om sodanige toewyding en verbintenis te bevorder.

Die doel van hierdie gedragkode is om 'n gedissiplineerde en doelgerigte skoolomgewing te vestig wat toegewy is aan die bevordering en handhawing van die gehalte van die leerproses.

Die gedragkode onderskryf die skool se missiestelling.


Leerders en hul ouers/voogde moet hulself van die skool se gedragkode en die bepalings daarvan vergewis. Sodra leerders by die skool ingeskryf is, is hulle onderworpe aan die gedragkode, en moet hulle dit stiptelik nakom. Indien leerders die gedragkode oortree of minag, sal daar ooreenkomstig die dissiplinêre prosedure vir leerders teen hulle opgetree word.



### 3. GEDRAGSKODE

#### Algemene reëls

- 3.1 Leerders sal hulle te alle tye as goeie ambassadeurs van die skool en ooreenkomstig die Louwtjekontrak van die skool gedra.
- 3.2 Terwyl leerders in die skool se drag of enige gedeelte daarvan geklee is wat voldoende is om hulle in die oë van die publiek met die skool te verbind, of terwyl leerders die skool verteenwoordig, hetsy direk of indirek, hetsy as deelnemers, ondersteuners, helpers, toeskouers of andersins, sal hulle hulself van enige gedrag weerhou wat die skool, personeel of hul medeleerders in 'n slegte lig kan stel.
- 3.3 In hul wisselwerking met die skoolhoof, adjunkhoofde, opvoeders en ander skoolpersoneel, moet leerders te alle tye die nodige hoflikheid en respek betoon en hulle weerhou van optrede wat op oneerbiedigheid of opstandigheid neerkom.
- 3.4 In hul wisselwerking met mekaar, moet leerders sover moontlik selfbeheersing aan die dag lê en wedersydse respek en verdraagsaamheid betoon. In die besonder moet leerders hulle weerhou van enige gedrag wat daarop gemik is om die fisiese, geestelike en morele welstand van enige ander leerder te skend, of wat daartoe kan aanleiding gee. Enige seksuele of onbehoorlike fisiese kontak tussen leerders op die skoolterrein of enige ander plek waar hulle as leerders van die skool uitgeken kan word, is streng verbode.
- 3.5 'n Opvoeder van die skool sal oor dieselfde regte as 'n ouer beskik wat betref die beheer en dissipline van die leerder volgens die gedragskode, sowel gedurende die leerder se skoolbywoning as gedurende enige skoolaktiwiteit.
- 3.6 Leerders mag nie in die klaskamer, saal, rekenaar- of mediasentrum eet nie. Die gebruik van 'n waterbottel tydens klastyd is toelaatbaar. Die kou van kougom gedurende skoolaktiwiteite is verbode.
- 3.7 Selfoongebruik gedurende skoolaktiwiteite is streng verbode. Oproepe mag slegs in noodgevalle en met die toestemming van die skoolhoof gemaak word. Selfoongebruik ná skool moet geskied volgens die beleid van die beheerliggaam.
- 3.8 Die rook, besit en/of gebruik van tabakmiddels, nikotienbevattende middels, e-sigarette, drank, ander alkoholiese middels of dwelmmiddels gedurende enige skoolaktiwiteit of wanneer leerders in skooldrag geklee is, is verbode. Dit is ook te alle tye verbode op die skoolterrein.



- 3.9 In geval van 'n redelike vermoede dat leerders hulself aan 'n oortreding van hierdie gedragskode of die landswette skuldig gemaak het, het die skoolhoof of 'n opvoeder die reg om sodanige leerders en/of die eiendom in hul besit vir enige gevaarlike wapens, gewere, dwelms of ander skadelike en gevaarlike middels, gesteelde goedere of pornografiese materiaal te deursoek wat die leerders moontlik op die skoolterrein kon bring. Sodanige leerders se menswaardigheid sal deurentyd gerespekteer word, en dus sal die deursoeking privaat, deur persone van dieselfde geslag, en in die teenwoordigheid van nóg 'n persoon geskied. Die deursoekingsproses en -uitkoms moet opgeteken word.
- 3.10 Enige optrede wat die administrasie, dissipline of doeltreffendheid van die skool onbillik benadeel, sal as 'n oortreding van hierdie gedragskode beskou word.
- 3.11 Skuldigbevinding deur 'n hof aan 'n strafregtelike oortreding sal as 'n oortreding van hierdie gedragskode beskou word.
- 3.12 Oortredings wat tot skorsing en/of uitsetting kan lei, sluit in, maar is nie beperk nie, tot:
- optrede wat ander se veiligheid bedreig en wat die regte van ander skend;
  - die besit, dreigement of gebruik van gevaarlike wapens;
  - die besit, gebruik, verhandeling of sigbare bewys van tabakmiddels, nikotienbevattende middels, e-sigarette, narkotiese of ongemagtigde dwelms, alkohol en bedwelvende middels van enige aard;
  - bakleiery, aanranding of mishandeling;
  - onsedelike gedrag of 'n gevloek;
  - die aanneem of voorhou van 'n vals identiteit;
  - enige vorm van haatspraak, seksisme, rassisme of ander antisosiale gedrag;
  - diefstal of die besit van gesteelde goedere, wat die diefstal of besit van toets- of eksamenvraestelle voor sodanige toets of eksamen insluit;
  - onregmatige optrede teenoor en/of vandalisme, die vernietiging of beskadiging van skoleiendom wat die aanbring van graffiti sou insluit;
  - oneerbiedigheid, aanstootlike gedrag en verbale mishandeling gerig teen opvoeders of ander skoolpersoneel of -leerders;
  - herhaalde oortredings van skoolreëls of hierdie gedragskode;
  - strafregtelike en onderdrukkende gedrag, soos verkragting en geslagsgebaseerde teistering;
  - viktimisasie, afknouery en intimidasie van ander leerders;
  - die oortreding van eksamenreëls; en

- opsetlike en bewuste verstrekking van vals inligting, of die vervalsing van dokumente, ten einde onbehoorlike voordeel te bekom.

#### 4. KLASREËLS

- 4.1 Die sogenaamde "Louwtjekontrak" met 10 (tien) geskrewe klasreëls geld vir alle leerders. Dit, tesame met hierdie gedragskode, het ten doel om onaanvaarbare gedrag te straf en uit die weg te ruim.
- 4.2 Die Louwtjekontrak en klasreëls is skriftelik opgestel en sal:
- 4.2.1 in duidelik leesbare skrif op 'n prominente plek in elke klaskamer aangebring word; en
- 4.2.2 aan alle leerders en hul ouers beskikbaar gestel word.
- 4.3 Leerders moet stiptelik en volledig voldoen aan die klasreëls, sowel as enige mondelinge opdragte wat die klasopvoeder of enige personeellid gee, en wat redelikerwys noodsaaklik is om hierdie gedragskode uit te voer en/of om die skool behoorlik en professioneel te bestuur.
- 4.4 Enige oortreding van die klasreëls sal as 'n oortreding van hierdie gedragskode en skoolreëls beskou word. Dit kan lei tot die ontneming van bepaalde voorregte van leerders:
- 4.4.1 leerders wat in aanmerking is vir 'n toekenning, sal nie meer in aanmerking geneem word vir die betrokke toekenning nie;
- 4.4.2 leerders wat 'n toekenning ontvang het, se dienste kan opgeskort word totdat die betrokke saak opgelos is;
- 4.4.3 leerders wat herhaaldelik oortree, loop die gevaar om deelname aan sport-, kultuur-, leier- en enige ander skoolaktiwiteit geweier te word.

#### 5. REËLS MET BETREKKING TOT VOORKOMS EN SKOOLDRAG

##### 5.1 Skooldrag

- 5.1.1 Die voorgeskrewe skooldrag moet gedurende skoolure én ander skoolaktiwiteite, soos wat die beheerliggaam bepaal, gedra word.
- 5.1.2 Skooldrag moet altyd skoon en netjies wees. Wat onderhemde betref, mag seuns slegs 'n effekleurige, wit onderhemp dra wat onder geen

omstandighede sigbaar mag wees nie. Kraaghemde moet te alle tye ingesteek wees.

### 5.1.3 Kleredragreëls: **SEUNS**

#### **Somer**

- Maroen hemp
- Grys kortbroek
- Grys kouse met skoolstrepe
- Swart skoolskoene
- Kaalvoet word toegelaat

#### **Winter**

- Wit langmou-skoolhemp
- Louw Geldenhuys-das
- Grys langbroek of kortbroek
- Maroen V-nek skooltrui (mouloos / langmou)
- Louwtjie-windjaker / Quantec-baadjie / Louwtjie-sweetpakbaadjie
- Grys kouse met skoolstrepe
- Swart skoolskoene (geen kaalvoete)

#### **Sport**

- Wit broekie vir rugby, tennis, krieket en hokkie
- Louw Geldenhuys atletiekdrag vir seuns
- Louwtjie-sportbroek
- Louwtjie-sporthemp
- Louwtjie-sweetpak
- Rugbytruie word deur skool voorsien

### 5.1.4 Kleredragreëls: **DOGTERS**

#### **Somer**

- Wit kortmou-skoolhemp
- Maroen romp
- Maroen of swart *ski pants*
- Wit sokkies
- Swart skoolskoene
- Kaalvoet word toegelaat

#### **Winter**

- Wit langmou-skoolhemp
- Louw Geldenhuys-das
- Maroen romp
- Grys kouse met skoolstrepe of swart broekiekouse

- Swart skoolskoene. Tradisioneel - bandjie of veters en plathak (nie modeskoene nie & geen kaalvoete)
- Maroen V-nek skooltrui (langmou of mouloos)
- Louwtjie-windjakkie / Quantec-baadjie / Louwtjie-sweetpakbaadjie

*Alternatief vir winter (baie koue dae):*

Maroen of grys langbroek (nie Quantec sweetpakbroek nie)

### Sport

- Louw Geldenhuys atletiekdrag vir dogters
- Netbal: atletiekdragbroekie, maroen rompie en Louwtjie-sporthemp
- Tennis: maroen rompie en Louwtjie-sporthemp, Louwtjie-sweetpak, Louwtjie-sportbroek vir oefeninge

### 5.1.5 Kleredragreëls: **GRAAD R**

Graad R-leerders kan óf die bogenoemde formele skooldrag dra óf LLG se informele skooldrag opsie van:

**Winter:** Louwtjie-sweetpak, Louwtjie-sporthemp en wit tekkies

**Somer:** Louwtjie-sporthemp en -broek

5.1.6 Slegs maroen musse mag op koue wintersdae op die speelterrein gedra word, voor of na skooltyd, maar nie in klasse of die saal nie.

5.1.7 Die beheerliggaam en Hoof kan na goeie toestemming verleen dat leerders by sekere geleenthede burger-/gewone drag dra. Sodanige drag moet netjies en welvoeglik wees.

## 5.2 Voorkoms

### 5.2.1 Hare

#### ***Dogters***

- Haarkleur moet te alle tye natuurlik vertoon. Geen haarkleursel of strepe word toegelaat nie.
- Hare wat oor die kraag hang, moet vasgemaak word.
- Kuif mag nie in die oë wees nie.
- Slegs haarbykomstighede (linte, kammetjies en bolletjies) wat by die skool se kleure pas, mag gedra word.
- Hare moet stewig vasgemaak wees en netjies vertoon.



### **Seuns**

- Hare moet kort en netjies geknip wees.
- Die gedeelte om die ore moet skoongeknip wees. Hare mag nie aan die ore raak wanneer die hare regaf gekam word nie.
- Wanneer die hare afgekam word, mag dit nie die wenkbroue raak nie.
- Wangbaard (*sideburn*) kan tot by die middel van die oor strek.
- Hare moet agter reëlmatig opgesny word.
- Hare mag nie uitermate van die kop wegstaan nie. Geen vreemde haarstyle word toegelaat nie.
- Haarstyle wat onder uitgeskeer of -geknip word (oftewel *undercuts*) is ontoelaatbaar.
- Haarkleur moet te alle tye natuurlik vertoon. Geen haarkleursel of strepe word toegelaat nie.

### 5.2.2 Juwele

- Geen juwele (soos ringe, armbande (rekkies óf leer) of kettings) word toegelaat nie.
- Slegs polshorlosies word toegelaat.
- Die dra van liggaamsjuwele (soos neus-, tong- en wenkbroujuwele) is verbode. Wat ooringe vir dogters betref, mag slegs een goue of silwer knoppie of standaard-goue of -silwer ringetjie per oor gedra word, en wel in die onderste gaatjie indien daar meer as een is.
- Geen steentjies van enige aard word toegelaat nie.
- Dogters mag een seëlring dra.


### 5.2.3 Naels

- Naels mag nie oor die vingerpunte steek nie.
- Geen naellak mag op toon- of vingernaels gedra word nie.

### 5.2.4 Grimering

- Geen maskara, oogomlyner of blosser word toegelaat nie.

## **6. SPORT- EN BUITEMUURSE AKTIWITEITE**




## 6.1 Deelnemers aan sport, kultuur en enige buitemuurse aktiwiteite

- 6.1.1 Leerders wat gekies word om die skool as deelnemers in enige sport- of ander buitemuurse aktiwiteite te verteenwoordig, moet gedurende en ná deelname aan sodanige aktiwiteit in die sportdrag, skooldrag of ander voorgeskrewe drag geklee wees soos wat die opvoeder wat vir daardie aktiwiteit verantwoordelik is, bepaal.
- 6.1.2 Alle leerders wat aan voormelde aktiwiteite deelneem, sal lojaal wees teenoor die skool en mededeelnemers. In die besonder moet deelnemers betyds en stiptelik by die plek aanmeld waar die aktiwiteit plaasvind of van waar deelnemers na die betrokke plek van deelname vertrek. Leerders wat gekies is om die skool in 'n aktiwiteit te verteenwoordig kan slegs van bywoning verskoon word indien 'n skriftelike verskoning vooraf aan die sport- of kultuurhoof oorhandig word. Onvermydelike afwesigheid van 'n aktiwiteit sal slegs verskoon word indien die sport- of kultuurhoof nie later nie as drie dae na afloop van die betrokke aktiwiteit 'n skriftelike verskoning ontvang.
- 6.1.3 Leerders wat die skool by sportaktiwiteite verteenwoordig, sal te alle tye hoflik optree teenoor, en aan die beslissings, voorskrifte en opdragte voldoen van:
- 6.1.3.1 die sporthoof en die opvoeder wat by die bepaalde sport betrokke is;
- 6.1.3.2 die skeidsregter of beoordelaar ten aansien van die betrokke aktiwiteit;  
en
- 6.1.3.3 die spankaptein.
- 6.1.4 Alhoewel daar aanvaar word dat leerders wat aan sportaktiwiteite deelneem dit met oorgawe en volle inspanning doen, moet sodanige leerders steeds selfbeheersing en dissipline aan die dag lê. In die besonder moet leerders hulle van enige onsportiewe gedrag, vuil of beledigende taal, betrokkenheid in gevegte of voorvalle, of enige vuil of onbehoorlike spel weerhou.

## 6.2 Toeskouers en ondersteuners by sport- en ander buitemuurse aktiwiteite

- 6.2.1 Alle leerders wat enige skoolaktiwiteit as toeskouers of ondersteuners bywoon sal, benewens die nakoming van die bepalinge van hierdie gedragskode, hulle van ontwrigtende, onbehoorlike, opstandige, onnodig opruiende of onbetaamlike gedrag weerhou. In die besonder mag leerders nie negatief op die beslissings van beoordelaars of skeidsregters reageer nie.



- 6.2.2 Leerders wat enige skoolaktiwiteit as toeskouers of ondersteuners bywoon, sal hulle onderwerp aan en neerlê by enige opdragte en aanwysings wat hulle voor, gedurende én na afloop van die betrokke aktiwiteit ontvang van die skoolhoof, enige opvoeder, lid van die Graad 7-bestuur, of ouers wat die skoolhoof aangestel het om met die vervoer, toesig of beheer van leerders te help wat na of van die betrokke aktiwiteit vervoer word, of dit bywoon.
- 6.2.3 Bostaande reëls geld ook vir enige deelname aan enige ander buitemuurse aktiwiteite buiten sport, behalwe waar dit ooglopend nie van toepassing is nie.

## 7. SKOOLEIENDOM

7.1 'Skooleiendom' sluit die volgende in:

- 7.1.1 Die grond en geboue wat deur die skool beset word, sowel as enige permanente aanhegting aan sodanige grond en geboue.
- 7.1.2 Alle ander eiendom, wat toerusting, boeke, voorraad, motorvoertuie en dies meer insluit, wat die skool besit, huur of berg, of vir die beskadiging of verlies waarvan die skool wetlik aanspreeklik gehou kan word.
- 7.2 Aangesien die skool ontwikkel en opgerig is vir gebruik deur alle leerders wat daar skoolgaan, is alle leerders verplig om alles in hul vermoë te doen om die skool se eiendom te bewaar, sodat dit tot voordeel van alle huidige en toekomstige leerders van die skool gebruik kan word.
- 7.3 Geen leerder mag enige skooleiendom van die skoolperseel verwyder sonder die vooraf-toestemming van die skoolhoof of 'n opvoeder van die skool nie.
- 7.4 Leerders mag nie enige eiendom van die personeel van die skool, medeleerders, besoekers aan die skool, of lede van die publiek hanteer, beskadig, merk, skend of vernietig nie. Hierdie reël geld eiendom op die skoolterrein, in die onmiddellike omgewing van die skool, by of naby die plek van enige skoolaktiwiteit, sowel as enige voertuig waarmee leerders vervoer word en die eiendom daarop.
- 7.5 Leerders mag nie enige skooleiendom beskadig, skend of vernietig nie. Enige leerder wat enige skooleiendom opsetlik misbruik, beskadig of verniel, moet dit vervang of daarvoor betaal. Vernietiging en/of beskadiging van eiendom is 'n strafbare oortreding.

## 8. GRAAD 7-BESTUUR

- 8.1 Die Graad 7-bestuur is saam met die personeel van die skool verantwoordelik vir algemene skooldisipline.
- 8.2 Die Graad 7-bestuur moet leerders wat oortree na die personeel van die skool bring, waarna lynfunksies gevolg sal word.
- 8.3 Alle leerders moet enige redelike voorskrif van 'n lid van die Graad 7-bestuur gehoorsaam, en moet die Graad 7-bestuur ondersteun en samewerking verleen in die behoorlike uitvoering van hul pligte.

## 9. SKOOLKENNISGEWINGS

- 9.1 Alle leerders is verplig om alle kennisgewings wat die beheerliggaam, skoolhoof of 'n opvoeder van die skool vir dié doel aan leerders uitreik, aan hul ouers te oorhandig, en om enige ontvangserkenning wat die ouers moet voltooi, stiptelik aan die klasopvoeder te voorsien.

## 10. SKOOLWERK EN HUISWERK

- 10.1 Daar sal te alle tye 'n ordelike atmosfeer in die klaskamer heers. Leerders mag nie onderrig versteur of verhinder nie.
- 10.2 Leerders moet klasopdragte stiptelik nakom.
- 10.3 Alle leerders sal 'n huiswerkboek ingevolge die skoolhoof of klasopvoeder se voorskrifte hou en bywerk.
- 10.4 Leerders moet die voorgeskrewe huiswerk doen en dit stiptelik teen die bepaalde spertyd by die betrokke opvoeder indien. Versuim om aan hierdie reël te voldoen kan slegs verskoon word indien die leerder op die dag waarop die huiswerk voltooi moes gewees het, 'n skriftelike nota van sy/haar ouers met 'n aanvaarbare verduideliking vir die versuim aan die opvoeder oorhandig.
- 10.5 Alle leerders moet hul voorgeskrewe skoolwerk met ywer, pligsgetrouheid en toewyding doen om sodoende 'n deurlopende werksetiek te ontwikkel. Versuim om aan hierdie reël te voldoen, sonder 'n aanvaarbare verskoning, sal as 'n oortreding van hierdie reël beskou word.
- 10.6 Leerders is verplig om enige werk wat hulle misgeloop het, so spoedig moontlik in te haal. Dit is hul eie verantwoordelikheid.

- 10.7 Leerders beweeg vinnig en ordelik van die een klas na die ander. Kleedkamerbesoeke gedurende klasruilings is nie toelaatbaar nie.

## 11. TOETSE EN EKSAMENS

- 11.1 Alle leerders is verplig om hulle aan die toetse en eksamens wat deur die opvoeders aan hulle opgedra word, te onderwerp. Versuim om aan hierdie reël te voldoen sal slegs in uitsonderlike gevalle verskoon word, mits die ouers van die betrokke leerder op die vroeë moontlike geleentheid 'n volledige en aanvaarbare skriftelike verduideliking aan die skoolhoof oorhandig.
- 11.2 Leerders moet hulle met die afneem van toetse of eksamens van enige vorm van oneerlikheid weerhou.

## 12. STIPELIKHEID

- 12.1 Leerders sal op die bestemde tyd aan die begin van die skooldag en met die aanvang van enige ander skoolaktiwiteit opdaag. Wanneer leerders laat kom, moet hulle 'n skriftelike verskoning van hul ouers verskaf. Leerders wat laat opdaag, moet eers by die registerklas aanmeld voordat hulle na hul betrokke klas gaan en word op 'n laatkom-register aangeteken.

## 13. AFWESIGHEID VAN SKOOL

- 13.1 Leerders mag slegs in uitsonderlike gevalle afwesig wees van die skool, en dan ook slegs met die skriftelike toestemming van die skoolhoof, of sy/haar verteenwoordiger indien die skoolhoof nie beskikbaar is nie.
- 13.2 Afwesigheid van die skool sonder 'n aanvaarbare verskoning word as stokkiesdraaiery beskou, wat streng verbode is.
- 13.3 Leerders wat vir een tot drie agtereenvolgende dae van die skool afwesig is, moet met hul terugkeer 'n skriftelike verduideliking van hul ouers voorlê. Afwesigheid vir meer as drie agtereenvolgende dae sal slegs verskoon word indien 'n brief deur 'n geregistreerde mediese praktisyn voorgelê word, buiten in die geval van dood of trauma in die leerder se gesin of om 'n ander rede wat deur die skoolhoof goedgekeur word.



- 13.4 Leerders wat sonder verskoning afwesig is sal 'n dokument ontvang wat deur die ouers onderteken moet word wat in die leerders se profiel geliasseer sal word.

#### **14. OMGEWING**

- 14.1 Leerders het die reg op 'n veilige omgewing en skool wat bevorderlik is vir opvoeding.
- 14.2 Leerders mag nie die skoolgronde of -geboue bemors nie.
- 14.3 Leerders wat toeskouers of ondersteuners by enige skoolaktiwiteit is, moet die terrein wat hulle beset netjies en skoon agterlaat, en moet seker maak dat alle rommel opgeruim en in vullishouers geplaas word.
- 14.4 Leerders moet toilette skoon agterlaat.
- 14.5 Enige optrede of versuim deur leerders wat 'n gesondheidsgevaar vir ander leerders veroorsaak of moontlik kan veroorsaak, moet vermy word.
- 14.6 Geen slagspreuke (graffiti), plakkers, plakkate en dergelike dinge mag sonder die toestemming van die skoolhoof op enige oppervlak by die skool aangebring word nie.
- 14.7 Leerders moet gehoor gee aan die redelike opdragte van die skoolhoof, enige opvoeder en/of lid van die Graad 7-bestuur met betrekking tot die handhawing van 'n skoon en higiëniese skoolomgewing.

#### **15. VRYSTELLING VAN BEPALINGS VAN DIE GEDRAGSKODE**

- 15.1 Leerders kan op kulturele, godsdienstige of mediese gronde skriftelik by die beheerliggaam aansoek doen om algehele of gedeeltelike vrystelling van een of meer van die items wat in die gedragskode vervat is.
- 15.2 Sodanige aansoek moet volledige redes én stawende bewyse insluit. Die bewyslas rus dus op die leerder om die aansoek om vrystelling te staaf.
- 15.3 Aansoeke om vrystelling sal slegs aan die begin van elke skooljaar oorweeg word, tensy dringendheid of veranderende omstandighede aangevoer kan word.
- 15.4 In die oorweging van 'n aansoek om vrystelling sal die beheerliggaam geregtig wees om enige inligting in te win wat hy vir 'n regverdigde beoordeling van die aansoek kan nodig ag.

- 15.5 Die beheerliggaam sal die aansoek om vrystelling met die nodige erns, objektiwiteit en verantwoordelikheid, en binne die raamwerk van die Grondwet en hofuitsprake oorweeg, en die leerder skriftelik van sy besluit inlig.
16. In geval van die oortreding van enige bepaling in hierdie gedragkode sal die voorgeskrewe dissiplinêre prosedure gevolg word.

## 17. GOEDKEURING

Voorgestel deur:	M BENSCH (Prinsipaal)	Handtekening:	
		Datum:	2019-07-22
Goedgekeur deur:	SJ BOTHA (Beheerliggaam-voorsitter)	Handtekening:	
		Datum:	2019-07-22